

Kuminsá na Hòspital

Tempu tempu un òf otro saniadó ta bishitá nos isla. Maske nan por representá diferente religion, nan ta sigurá nos ku nan ta sigui ehèmpel di Hesus; ku nan ta kura ku poder di Dios. Ma esei ta berdat?

Mi'n tin duda ku Dios tin poder pa kura. Beibel ta duna amplio evidensia ku Dios por sania den un será di wowo. Ma normal esei no ta Dios Su prosedura awendia. Dios a duna hende sabiduria pa deskubrí tratamentu òf remedi. Pues, en general E ta kura dor di medikonan.

Ta bon pa realisá ku no tur “kuramentu” ta bin di Dios. Diabel tin hopi poder, asta poder pa kura. Bastante antiano desesperá pa haña nan salú ta gasta un bòshi di sèn bishitando un bruha, haladó, òf médiko spiritual ligá ku diabel.

Ademas, tin enfermidatnan sikogéniko, kousá pa loke e persona ta pensa. Ora e person ta kambia su pensamentu e ta “kura.” Igualmente dòkternan merikano ta kalkulá ku 60 pa 90% di tur pashènt na hòspital tin un enfermidat sikosomátiko, esta un malesa físiko ku por “kurá” dor di trata ku e origen sikológiko òf emoshonal. Tambe den hopi kaso e kurpa humano ku tin abilidad pa kura su mes. No wòrdu gañá; no tur “kuramentu” ta genuino; **no tur kuramentu ta di origen divino.**

Ta lógiko pa pensa ku Hesus a eksemplifiká e manera ku Dios ta kura. Ban nota diferente karakteristikana di Hesus Su kuramentu i kompará nan ku táktikanan di saniadónan awendia.

1) Ora Hesus a kura, e enfermidat a desaparese por kompleto. Awendia sanaidónan ta freska doló, pone hende lam kana, èts. Ma bishitá e enfermo “kurá” mañan. El a keda ku e mesun problema físiko. Echu ta, e persona nunca a kura. **Ora Dios ta kura, e enfermo ta KEDA salú.**

2) **Hesus a kura TUR enfermidat** (Mateo 4:24). Segun Beibel, Hesus a kura hende ku lepra, keintura, man seku, surdu, muda, siegu, paralisá, dewater, lam, sangramentu, èts. Ta un echu ku saniadónan awendia no ta sania tur enfermidat. Mas parti nan ta “kura” enfermidatnan sikosomátiko. Algun saniadó ta laga un asistente skrin e enfermonan promé ku nan tin chèns di subi plataforma. Hende ta mira e kuradó “sanía” esun ku doló di lomba, mientras e siegu ni ta haña turno.

3) **Hesus no a limitá Su kuramentu na esnan ku fe.** Hesus a “kura TUR ku tabata malu” (Mateo 8:16) irespekto di nan fe. Kasi tur saniadó ta sigurábo ku bo por kura, basta ku bo tin fe. Esaki ta un táktika astuto di parti di saniadónan. Si bo no ta kura, ta bo mes falta...bo no tabatin basta fe. E supuesto saniadó ta saka su kurpa liber... e no ke pa bo pensa ni pa un ratu ku e no tin abilidad pa kura! Hesus no a hunga wega kruel asina ku enfermonan!

4) Hesus a kura unda ku ta. Unda ku El a topa hende ku nesesidat físiko—riba kaya, den kas, den desierto, den multitud—ei El a kur'è. Ma saniadónan moderno, pretendiendo di sigui ehèmpel di Hesus, nunca lo riska hasi esei. Nan por “kura” solamente den un ambiente kontrolá, por ehèmpel den un sirbishi unda nan por usa táktikanan sikológiko.

Si un saniadó di berdat tin don pa kura, pakiko e no ta baha di avion bai dirèkt pa hòspital, unda e nesesidat pa kura ta mas urgente? Despues ku tur pashènt a bai kas, dikon e no ta bai na kas di sosiegu? Ei e lo por sania tur esnan ku artritis, pone pia amputá krese bèk, restorá sano huisio na esnan ku verkalking. Pakiko e no ta sigui su ruta pa tur kantor di dòkter i restorá salú di kada enfermo? **Pakiko saniadónan no ta despuesto pa hasi esei? Pasobra nan no por kura!**

No mal komprende. Mi no ta bisa ku Dios no tin poder pa kura. Alkontrario mi ta konvensé ku Dios **por kura i ta kura...** asta awendia. Pero no laga nos kore siegamente tras di trasteria. Otro biaha ku un hende ku ta pretendé ku e tin abilidad pa sania ta bishitá nos isla, lag'è kuminsá kura unda e nesesidat ta mas grandi, unda por proba e saniamentu. Lag'è kuminsá na hòspital.